


廣廣文選 六




漢書門			
類	號	函	架
一〇八	二四	二四	二五

一〇八	二四	二四	二五
號	函	架	冊

內閣文庫	
番號	漢 11086
冊數	25(.7)
函號	361 41





廣廣文選卷之六

淺草文庫

四明 周應治 纂



嶺南門人彭光鳴校

七

七契

昭明太子

奚斯逸士肥遁棄榮蓮峰於焉刻跡灌水是用庇
形口不悅於五味心不娛於八聲鄙巢父之稱哲
笑蘇門之為英鵠蓋龍旂初不闕意鳳吹鼉鼓終
不屑情跨四海而擅美邁三古而振名居山林而

不返終無慮而無營於是辯博君子詞若湧泉言
踰却秦之魯辯超稷下之田欲抑則大鵬垂翅欲
抗則尺鷃冲天聞逸士之懷寶乃拂衣而造焉駕
兩駮之如手乘輕車之若流爰自畿甸徑造山周
傍瞻虹見俯眺雲浮鳴禽聒耳零霧蔽眸唯一壑
之為阻無三逕之可求於是披榛陟路援蘿踐巖
雖跋涉而不休覩逸士之所託其為居也寂焉而
靡所聽瞑然而無所瞻三春蔓戶八桂攢簷車門
鳥宿圭竇狻潛風來室搖霧下窓霑寔人跡之罕

至逸士於此而獨淹君子曰蓋聞智士不希狷介
仁者莫有迷邦傳說終受啟爵呂望遂啟齊封余
敬吐誠而畢慮子能留志而見從乎逸士曰鄙人
固陋自潛幽藪必枉話言敬聆金口君子曰若夫
夾鍾之節春景依遲碧樹初葉綠草含滋春臺之
樂信矣熙熙於是百金之士萬鍾之家招搖隆富
徵集豪華駕紫駟之馬乘青蓋之車出自高宇行
無挾斜陶嘉月而結交遊藉芳辰而宴朋友望宜
春以隨肩入長楊以携手金盤薦美藉之珍玉杯

沉醪清之酒義曰和神事非爽口於是娛樂未終
 留一作曦光將夕飛觴引滿奮袖舉白投轄安坐歡
 甚促席以會雕蟲之賓加有清談之客論同炙輶
 藻若陵雲戴憑不能高其說相如不能擅其文無
 玄不折無細不分搦簡玉振下筆蘭芬乃亦六郡
 擬非直三蜀茂聞屬虞泉氣晚朗月潛曜清卮未
 闌宵景方照竒舞遙作名謳斯召約綽妍姿婢媢
 宜笑綺縠風吹珠璣星耀齊竽颺參差之響趙瑟
 奏鏗鏘之妙茲亦遊讌之至娛子能偕此而為樂

乎逸士曰輕蕩遊觀非予所耽得性行樂從好山
 南君子曰輔性和神實惟至味非直方今見重乃
 亦一作其自古攸貴不周之和調腸補一作輔胃雜以
 龍肝饜炙豹一作豹舌猩唇劉氏之醢范公之麟鶴
 出雲際鱗來江岷蒲俎芬馥古聖所珍其酒則蒼
 梧九醞中山千日取譬湛露擬之飴蜜百味交馳
 三雅間出若其珍異則脩筵斯溢千品萬類不可
 詳悉西母靈桃南楚萍實東陵之瓜北燕之栗湖
 畔之柿江陰之橘張掖白柰恒陽黃黎河東洗大

隴蜀躡鷓並怡神甘口窮美極滋加以伊公調和
易氏燔爨傳車渠之椀置青王之案瑤俎既已麗
奇雕盤復為美玩子能與一作從予而亨之乎逸士
曰甘臙腸腐五味口爽伊人素蓄無羨方丈

君子曰千里之駒出自余吾伯樂所選伏波所模
通肩合相平腹應圖激雷北速躡景競驅騰黃弗
敢擬駿赤兔莫與爭途異態踈蹉奇姿倚倚逸足
驟反遊雲移駛形函遊葉日不暇陟迺飾金羈之
昭晰加以玉鞍之輝煥連乾麗靡輕蘓粲爛逸氣

既為勝矚美飾重成壯觀蹄蹶紅塵膺流絳汗風
起龍驤仄聲鳥散自古迄今人誰不玩逸士能就

一作從予而乘之乎逸士曰遊逸輕佻策馬爭驅粵

今樂靜豈能感娛一作感吾娛

君子曰光形飾體莫過鮮衣冠鷄鷄之長纓若曾
雲之零霏琅玕珮言飾于背飄颺輕裾是用曜
軀方空之綬弱紈之蕉暑絕炎而已却風未而先
搖既唯照麗蕙以輕鏘似朝霞之發彩若夕景之
舒光至夫杪秋既謝寒緒中人則輕狐稱美豐貂

表珍斯乃赤也所以去鄒孟嘗所以出秦步光之
妙樞具之華君子武備所用禦邪標以珠玉飾以
蓮荅其任則百冶精銳利擬秋霜豈止在身為美
服襲稱臧固乃龍躍於襄水見氣於南昌幽通神
化其妙難詳將與逸士服之以相狎逸士曰紛紜
避暑緼袍禦冬鮮麗綺靡未之或從

君子曰寔有喬桐抽葉青葱結根善地擢幹華嵩
棲鳳魯山之側藏龍平陵之東拂曖暎之高雲鼓
梢殺之雄風茗亭萬仞寔造天中乃使匠石運斤

班輸琢錘製起玄脩形踰綠綺與金石而鏗鏘共
縑竹而曼靡托北方之佳人命高樓之杞氏間以
巴隴才僮邛郫妙妓騁獸為之輟馳飛禽為之不
徒加以荆和之飾照耀柘絲之絃激揚三聲吐韻
四結流唱辭高薰奏響溢芝房竹來嶰谷律寫歸
昌再鼓而玄鶴集九成而儀鳳翔初音魚踊餘妙
繞梁何止田文慨慷劉靖心傷而已哉中山青曲
若折而和揚美日以流眄故玉齒而安歌歌曰陽
阿奏兮激楚流望洛水兮有好仇縱輕擢兮泛龍

廣雅釋義 卷之六 五
舟將與逸士陟彼華堂憩諸閎館玉宇明華文階
燦爛旋題昭晰珠簾彪煥身託玳瑁之筵目寓瓊
華之玩止以悅諸和性之樂豈非綺麗之觀哉逸
士曰居茲四郭寧辨五音靡曼不極君子弗欽雖
聞贍辭之銳無會野人之心

君子曰白藏肅殺天高野清玉樹始落金葉初榮
幕鷺北反沙鴈南征寔秋收之美節將校獵以娛
情使櫪無伏馬巷靡遺行執戈於芊眠之野彎弧
於曠浪之陰養由輕盼則林摧鷲獸蒲且效技則

虛下翔禽騰猿蹙其足虡虎不擇音掩兔鱗鹿既
幾古之焉有填坑滿谷亦眇昔之上林至於輕繳
繞飛則連鴻解羽微纖始放則並鱗失波豈論玄
泉之則寧願將遨之歌弭節言旋禽不可筭周旋
眺覽足為京觀子雖山栖其從此玩逸士曰解網
垂仁啟王美則聞聲不食孔聖淑音害蠢類而為
樂豈君子之用心

君子曰蓋聞地美養禾君人愛士澤被無垠光照
郊鄙蒲輪必鄒魯之儒宗紆青必洛陽之才子大

漢愧得人之盛有周慙以寧之美萬國若翁從一作

同從四海同使指刑措弗用一作囹圄斯虛既講

禮於太學亦論詩於石渠戈有載戢史無絕書銅

律應度玉燭調和黃髮擊壤青衿興歌元帥奇士

庠序鴻生求禮義之汲汲行仁義之明明隆采椽

之義却玳瑁之榮當朝有仁義之睦邊境無烟塵

之驚信如四氣明並三光厨蓬挺茂堦莫比芳瑞

鹿擣素祥熊耀黃靈禽樂園儀鳳栖堂太平之瑞

寶鼎樂協之應玉羊丹鳥表色玉露呈瀛野絲垂

木嘉苗貫素固以德苞子如道邁虞唐六合寧泰

四宇咸康不煩一戟東甌膜拜詎勞一卒西域獻

琛鹿蟲稽顙以悛惡樓蘭面縛而革音吾疑皆去鼻

飲之穴棄烏舉之深固以澤流無外恩被遐方福

此嵩岱道則窮蒼豈有聞若斯之化而藏其皮冠

哉逸士曰鄙人寡識守節山隅不聞智士之教將

自潛以糜軀請伏道而從命願開志以滌慮

七勵

簡文帝

藏名外臣體道好異遁跡埋影刻人心事任性於

蓼水之側放心於自得之場情苞六合德貫九方
巖栖谷飲絕際濠梁於是寂鏡公子聞而往說乃
飛車翠蓋翔駕絳螭丹旌鳳轉碧幔雲移映玉軼
之綺靡照銀車之陸離經九橋一作之夔阻歷五
曲之噴危路入閭風道經通谷橋塗決漭路林蕭
蕭石磴窮窿松關重複羊腸望斷邃路迂餘非林
稅駕乃遇藏名之所居其居則蘚苔沒砌幄葉斜
林千峰沓頂萬仞懸深南危碧流北障芳林左榮
重陸右背高岑煙霞罩日石礪籠陰聲音百籟響

美千禽寂鏡公子曰蓋聞智者不懷道沒志遺俗
埋名迷邦碎寶却粒辭榮今欲說子以默語之術
寧欲聞乎藏名曰僕雖幽栖遠紆名德寧忘潔已
以受至言

公子曰夫怡情託體寔寄閑宮跨危樓於朽詣挂
日影於迎風玩靈華於僊掌度窈窕於飛虹金枝
照曜玉壁玲瓏文窓洞右飛閣凌東桂柱通光雄
梁亘日璧鏡鈕懸抽荷井出中宿錦筵長廊周密
青錢碧影金墀玉律冬閨溫煦夏室含霜圖以珍

恠畫以禎祥青茅秋藹綠蕙春香植宜男於粉閣
樹君子於椒房迴風烟於璇題垂珠璣於玉箱文
魚水宿錦鳥雲翔乃登陟遊踐望遠通踈擢素藕
於石鏡舉蔓艸於康衢若荆山之琢玉似隨水之
弄珠若斯宮之閑麗子能與我而共居外臣曰僕
遊心蓬蒿未暇斯處公子曰夫靚粧嚴服託體必
嘉五綵擅美獨壘稱華組帷絜綵緹室含葩丹墀
聚葉縷檻飛花至如稷下縫掖泗上章甫雉緝霜
鮮素絲園縷鳳色龍分鴛文鵠聚瑀紛瑤席綺飾

瓊珮齊都滑石南海瑤瑁散似綴珠離如並績蜘蛛
弄巧越女調樞夏則桃笙竹席冬則青莞金鬚
溫麗瓊臺密華承寢當戶之殼大文之錦華蒲萄
之綺衾麗芬若之丹枕金蘇翠幄玉案象牀子能
從我樂此芬芳外臣曰帶索披裘自得山性雕章
麗服未敢攸同

公子曰五飴調神三芝輔性用康仁壽以弘貞正
乃使有伊之徒調嘗鼎味九州珍雜八方豐貴名
庶天地之聲殺竭山海之味蟬鳴秋稻鷺領玉精

離紅之膾勺藥之美蒙山擅重灌水傳聲桂蠹石
 瓊龍胎鳳肺四膳八珍五肉七菜纍似穀雜切均
 鮮繪色若紫蘭紛如紅綵若乃越梅變實楚醴方
 添陳晨鳧之美味薦雉鷩之肥甜洗以三危之露
 水調以大夏之香鹽霜薤沸烈露葵繁舒芳旅之
 菜白霜之茹澄瓊漿之素色雜金筍之甘菹素醪
 浮氣醪醪凝清獻三爵之踰雅等千日之芳醴酌
 玉斗之英麗照銀杯之輕蟻一作蟻此亦天下之美
 味子能從我而享之乎外臣曰藜藿可膳薇蕨堪

飡五味口爽寧假玉盤

公子曰若夫釣臺之樂葛天之歌飛七盤之妙節

動六變之清和綠綺麗琴丹山寶瑟縷器倕雕孤

一作孫枝伶律奏白雪之楚緩陳亭席之吳疾躍鳥

追飛潛魚伴出將使漸離擊筑雍門鼓琴鳴繞梁

之妙響發愁戶一作眉之清音至如五陵金穴六郡

豪家遠一作表流歌於東夏出秘舞於京華金鈿設

一作翠步搖藏卷遙同暮雨逼似朝霞髮髻如點

纖腰成削玉齒笑容紅粧綽約疾趨巧步霧袖芬

披舒蛾眉之窈窕委弱骨之逶迤載金翠之婉婢
珥瑤璫之陸離芬芳於梧一作吾春之苑灼爍於長
州之中于時斜光西委薄霧舒紅隋珠照影羅衣
從風觀者方堤覩者盈淇令二鸞之綴翼使八鶴
之增悲明君為之歛泣西施為之解眉於是蘭閨
寂晚曲韻相和對輕風之落景望明月以清歌歌
曰醅醕半兮樂既陳長歌促節綺羅人拂鏡弄影
情未極迴簪轉咲思自親此亦聲音之盡妙子能
從我而聽之乎外臣曰淫聲亂耳未足入聽方追

山壑未弄林泉

公子曰夫心遊百氏理奧六經樞機性道陰陽宵
冥昭玉牒於年史覽石記而照情若夫鄒枚上客
揚馬俊人揮金入趙易服歸秦賣舌彈劍買義追
仁商權萬古弋釣陶甄池中水黑席上稱珠判二
氣之氛氳辨六文之終始鳥變龍工鳳書雲紀辭弘
八索辨崇三耳至如范睢拆脇豫讓拉齒禮竭中以
報深國士碎玉爭城藏圖解劍見碣石之金堤望楚
都之揚塹美陳平之反間揖子房之智謀想秦君之

傳器仁漢后之解裘此亦天下之奧籍得性之林圃
子能同覽悅日以齊此心外臣於是色動清顏頓解
高意曰僕雖野陋頗悅帶經但負薪多疾未甘斯說
公子曰夫氛氳構象純雜不同共工折柱雖播英
風自古而然曾何足道但吹沙役寇抑自犧羊吐
霧藏妖聞之堯日至於今者昌運天啓握歷寶年
風猷駕層美道德漏重泉至如玄蹄外境紫舌頑
人悖而無禮不沫皇仁於是騰三泉之宵漫戴五
旗之飄揚引玉車於西隴鳴金鼓於北邙拭龍泉

之雄劍瑩魏國之寶刀銛踰巨關利擬豪胄至如
牽鈞壯氣斗膽雄心腰緣白玉帶珮黃金酬恩報
死尅遠長岑驪褭白鷺耀躍青離五玉察善十相
無遺連腰錦帶半足塵飛標威於鴈門之境振旅
於龍突之鄉若乃驚沙絕岸苦霧綿長秋河曉碧
浴蕙山黃紅顏素改玄鬢班霜征夫抵掌而飲膳
壯士憤氣而沸腸迴雲鳥之密陣背却月而相望
旗才轉而漂杵鋒未至而驂傷前鋒紛其易幟後
騎決其沙囊何湯雪之能比豈拾塵之可方於是

呼韓頤頤龜茲銜壁羊牽旣桓熊山已積九截同
文八極齊軌帝曰念功班茅賜履青紫如拾賞歸
詔美此亦天下之壯績子能從我而效之乎外臣
曰葛伯不祀雖聞湯誥野叟力弱未敢振衣
公子曰堯舜垂拱煥彼前聞今惟聖曆萬代一君
璧儀照氣玉井珠分德合天地道方華勳滄海碧
徹黃河一作流代黨文愛人育德澤等春雲一作工宣尼
茂典周姬禮容黃裳進士清襟俊童邦知改俗國
化移風賣藥無藏名之老河泗無洗耳之翁德星

夜映慶雲晝色異草雙條靈禽比翼狐尾旣九茅
脊復三金船樣寶銀甕呈其康歌壤笑悅禮樞談
隆周謝德盛漢知慙慈照無疑化湛靈覺散滂弘
淳拯澆敦朴國被仁壽家欣無學三明鑒道六度
弘風出塵照苦入冥觀空善識無盡因性必通天
不受寶地無隱瑞石神受職三苗奉義石策一作紫
紫泥繩金玉刺或託飄梁甫權卧德而龍盤或織
箔渭濱耻藏名而鳳跂於是露點飴密溜泓澄於
玉掌雲垂五采覆旖旎於僊樓漾醴泉於浪井拂

垂楊於御溝或聯七葉一姓五侯外臣於是觀色
內動神貌外移忽正山中而言曰蓋聞幽居獨善
見機往聖儻不遺滕叟亦願順來命

七詔

梁人

假是先生負茲勁逞狀群飛之器

吉吊切高聲大呼也一本作喪

古喪

侶似獨行之迷逕神忽忽而若忘意衝衝而

不定鑿丹綠其無主聞鼓鍾以失聽至乃冬霰積
庭室靡人聲春荅滿野他無行者園堵常閉曲突
無煙同生芻之暫有共死灰之壹一作燿篤論公

子聞而崛起雖道術之可忌亦切磋之所耻命徒
御以絡繹將有事於巖中車煜爚而流水馬泮渙
以追風乃踰汗漫入蒙籠至深潭之澗溟有洞室
之窮崇居隱磷而出沒望嶽岑而下上竹距石以
斜通水韻松以含響地不寒而蕭瑟日無雲而曠
朗於是整容投刺屣履一作排門揚眉就席舉袂
而言曰若五秀稟其生靈六情通其愛惡憎共集
於鄙老嗜同歸於美樂今足下群鳥獸以為娛處
貧賤而不忤欲賓實於孤介乃貽譏隕獲至乃喀

喀死於道邊。脊脊填乎溝壑。削松筆以畫虎。鼓鉛
 刀以刻鶴。身既勞而不見事。何感而莫懲。欲模名
 於帶索。豈知命於泥繩。何異走長衢以避影。煎流
 水以求冰。今欲道足下以衛生之秘術。怡神之妙
 道。譬之愈投於寒。植同起尸於僊州。寧願聞乎先
 生曰。有為之生。已逼無益之慮。常勞若見明於礙
 滯。幸求救於盲膏公子。曰。千門始構。百常洞啟。激
 洛開渠。疏山抗陛。延袤水陸。曠望東西。下臨江海。
 上屬雲霓。百丈杳冥。以飛跨九層。鬱律以階梯步。

三休而更迴。塗中宿而方迷。雕牆屈曲以交牙。網
 戶周流以重積。既陰泫而影響亦叫嘯。而迴一作
 易沙板金鋪紫柱。玉鳥煒煌。燿艷硃搏。敞圖雲
 霧之蔽。虧狀神僊之來往。壁璫自耀。珠綴恒響。蟬
 游動而晝喧。熠燿飛而夜朗。既臨下以寥沉。亦憑
 高而決漭。聞疾雷於階陛。一作弄犇星於帷幌。亘
 以曲堂。周以洞房。北負連闈。南注長廊。綺疏交映。
 鏤檻相望。鸞飛蓮并。日落杏梁。陽鳥騫其搏。動雲
 鳳矯而欲翔。若乃後沼開源。延石崇壤。擬崑閬之

廣文選 卷之六
嶺峒比滄溟之瀆濔其中則有桂宮栢寢吳臺拓
館複道耿介而連雲阿閣穹隆而仰漢望虬欄之
映水見丹鶴之出岸豔草奇色臺樹珍名長生靈
壽男華女貞河柳垂葉山榴發英翫奇峯於春滿
摘其實於夏成此實宮苑之壯麗豈能從我而為
榮先生曰多言反道辨口傷實惧貽弊於部家且
自安乎容膝

公子曰銅瓶玉井金釜桂薪六穀九鼎百葉千珍
熊蹯虛掌雞跖猩脣鱓子林切魚兩味玄犀五肉捨

郊鳳巢剖胎豹腹三臠其口七菹愜目蒸餅十字
湯官五熟梅椒魯豉河鹽蜀薑劑水火而調和糲
蘇葑以芬芳脯追復而不盡犢魚稍割其無傷黿
羹流歎蜆醬先嘗鱠温湖之美甜切丙穴之嘉魴
落俎霞散逐刃飛揚輕同曳蠶白似飛霜蔗有盈
丈之名桃表蕪斤之實杏積魏國之貢菱為鉅野
所出衡曲黃梨汶垂蒼粟隴西白榛相南朱橘荔
枝沙棠蒲萄石密衣稱素腕之美棗有細腰之質
並抗吻以除煩亦咀牙而消疾於是三雅陳席百

味開印玉機疑星稀蘭英縹潤既夷志於坎壈亦
懷忘於鄙悵此蓋滋旨之極珍豈能從予而共進
先生曰不貴媮食寧甘醇酒既深悟於腐腸豈自
迷於爽口

公子曰秦氏獨立燕姝絕世如短如長不穠不細
信耳目之妖冶乃古今之佳麗妍姿豔逸淑性閑
華效施顰於宋里經一作墮馬於梁家折纖腰以
微步一作於里一作搢一作皓腕乎輕紗臨池正領拂鏡
看蒼觀堵墻以颺香傾城國以誼譁墨欲歸而抽

軫車欄也疑作軫車後橫木也 惠將返而迴車至迺鄭衛繁聲

抑揚絕調足使風雲變動性靈感召擊哀響則春

臺之人愴焉而雪泣一作起懼情則崩城之婦媢

然而微笑嶰谷調一作樓一作鳳之竹一作龍門獨鵠之

柯綠珠絳樹宋獵韓娥青春婉婉上客經過開洞

房以命賞召才人而合宴率輕幔以徐來隔珠簾

而可見牀披珠一作象簾展羅薦聽促柱之方進

聞廣聲之始嘯步想象以頓足婉躡蓮一作而拂

面托斜視於遺簪寄含情而舉扇俄而夕鳥東反

落日西懸綺霞映水娥月昇天解鴛鴦之繡被拂

距鴛之長氈燭中

一作羽

幃而動爛香山

一作薰蕙

帳而

微烟願橫襟以自昵脫斜領於君前此乃聲色之

妖蕩將不從我而留連先生曰淫聲非篤論之旨

麗色本余情所棄伐國不問仁人此言從何而至

公子曰歲晚農休時閑務隙山火已燎野霜初白

聊效殺於秋冬乃後禽於州澤蜀地五丁齊國二

子氣動山漂汗揮雨起渥洼流頰

一作緒

蘭池照血

躡飛影於未形赴犇星於欲滅革車隱隱轂騎闐

闐鼓譟誼而振地烝徒駭而眙天割玉之刀飲石

之箭置羅布其一目罟網周及三面犬號驤騎鷹

名奔電暫離已合忽隱仍見赴迥超危衝林跋援

草隨足起山從眼轉跨躡岡澗電舉陵陸鳥不及

飛獸不遑伏既前輻而後赴亦左排而右蹴疑

躡實駭而自救騰虛亂而相撲視灑血之丹地見

飛毛之暗目傍窮刳剖勢極搜求文皮坐裂臙尾

生抽手羈鐵頂足批銅頭象折牙而凌遽貂拉齒

而夷由擒高樓之度索走大樹之神牛鴈聞弦而

跼墮後抱木而啾啾笑楚王之雲夢耻漢帝之中
流此武材之矯猛豈能從我而畋遊先生曰馳騁
傷仁好殺非勇幸廣內之豐樂何禽荒之足重

公子曰跋烏始照宮槐遽而欲舒顧兔纔滿連英

紛而就落一作跋烏始照宮槐遽吹舒顧兔而纔滿眇連柯而就落譬光影於

飛浮比生靈於栖託擾擾摩肩鱗鱗方駕立怵迫

於毀譽獨啟勤於用舍嗟向有而今無歎後榮而

前謝清歌雅舞暫同於夢寐廣厦高堂俄成於幻

化若夫洗精服食慕道遊僊尋主塵於萬里守金

竈於千年三戶可度九轉傳飛騰水陸咀嚼灵

玄若乃壁上真辭枕中秘要彈壓神鬼吐納靈妙

既變醜以成妍亦反老而為少虬駕天矯而出沒

霓裳颯沓而容與接鵠馭於後乘追鳳簫於前侶

雨散漫以霑服雲霏微而襲宇瞰芝闕以窈窕見

玉臺之相距盖排煙而漸滅旌拖風而未舉值解

佩於江濱逢弄珠於漢渚薄遊玄圃弭節太華列

神童於羽帳侍玉女於僊車澗採芳危實苑拔芳

迴蒼聽弱水之晨浪望崑山之夕霞窮北辰而比

壽指中岳以為家此神僊之恍惚豈從我而獨邪
先生曰捕影之言莫測繫風之論難盡未嘗留意
於死生豈復稍論於椿菌

公子曰洙泗遺文鄒魯餘烈其道未遠其風不絕
方領圓冠金口木舌談章句之遠旨構紛綸之雅
說陳五禮明六詩貫穿微妙辨折毫厘既侍問以
重席亦覃思而下幃醞籍愷悌和樂緝熙生徒肅
肅賓友師師並接衽以聞道俱援手而受辭心絕
內戰事無外慾橫經者比肩擁篲者繼足醜申韓

之法令陋桓文之風俗六郡漆其衣冠五陵窮其
軌躅信斯文其若水實斯人之如玉若夫珠璣產
於蚌蛤珪璧出於山淵未有玉不瑩而為寶人無
學而稱賢蓋持身之管籥進德之舟船響如鍾而
待叩明似鏡而常懸此見重於經術寧降志於吾
賢先生曰誠此言之甚美比斯道之為曠耻見嘲
於腐儒豈求珍於席上

公子曰我大梁之啟基方遠古而無疋先天定始
比啟周而餘裕揖讓受終考唐虞而不失道德有

序憲章咸秩六府孔脩百司盡畢搜求儒雅招拾遺逸旰食思治雖聞之於昔談昧旦臨朝乃見之茲日蕩蕩薰風泱泱大興道含弘而廣被澤汪濊而傍闡採輿人之片言納匹夫之小善事在微而畢照然無幽而不顯若夫下車布德伐罪弔民風無偃稼雨不破塵覩勝殘於暮月見成俗於浹辰含一作幽群生兮如海養萬類其猶春鄉無豕食之祿野靡狼顧之民樵者目金而知耻耕夫讓畔以成仁何大連之足競豈燕陸之能隣壁水道庠

序之風石渠啟瑋璋之盛竒士輻湊而騁足異人間出而效命小大之獄無寃民翺飛之物無天性故能睦之以九世齊之以七政坦坦恢恢巍巍赫赫政德洽於霜風教義窮於足迹望雲氣而欵關候海水而重譯所謂府不輟貢吏無虛帛天瑞磊砢而相尋地符氛氲而不少收六穗於征賦翫九莖於池沼三足應感而來儀一角知時而自擾映景星於初月聆鳳音於將曉若乃亭毒不疵合天地而並施陶鈞日月與造化而齊功故非言辭之

廣廣文選 卷之六
可具畫筆札之所能窮懷真獨往之夫犇走而從
事滅迹藏名之士顛倒而向風二漢有同於兕戲
魏晉無礙於胸中言未畢先生攝衣而起曰子前
所說似玉卮之無當徒費辭而難領譬由背日而
視秋毫却行而求馱卸一聞皇王之盛則豁然神
悟而理據志無時而可卷邦有道而宜舒敢以淺
智請從一作後車

七誘

蕭子範

幽遁公子不由義路不入禮門人主馬得為臣公

侯難以為客有暴勢大夫驅美澤之車策千里之
馬乃至公子之所居大夫曰收苗山之鋌採邪谿
之銅既云時吉亦曰天中金英內曜銀精外通均
如屈楊之舒彩繁若芙蓉之始紅七星布而成列
五色變而無窮寶兼千萬聲重二都邁茲巨闕超
彼鹿盧呈形薛燭表質風胡大夫曰玉饌方丈蕙
肴果器法磬吳章妙窮伊摯若乃豹胎之貴鳳印
之珍常山之果醴水之鱗大夫曰訪幼女於蔡邑
選佳人於趙都或拾翠於神渚或採桑於城隅見

者忘鋤而留矚行者下檐而踟躕女乃歌曰井上
李兮隨風標垂翠帷兮夜難曉獨處廊兮心悄悄
懷素縷之雙針願因之於三鳥大夫曰若乃帝思
啟士命將朔方守邊鄙而擁角節集兵旅而牙牙
璋或埋輪於絕域或繫馬於遐疆功格宇宙威振
蠻荒大夫曰逸態之赤兔駿足之麗駒龍文重於
漢廐魚目貴於西都若乃似鹿之體如龍之姿纒
以紫纓繫以青絛大夫曰冬軒陽木夏伐啟材剖
剝之功並至鉤繩之妙咸來擬天文而特建象地

戶而高開麗前脩之金屋陋曩日之璜臺若乃緹
錦遍室丹青被土白珠之簾水精之柱綺井鏤而
重葩華楠煥而相距文石之井珊瑚之樹紫複峻
而連天青綺高而干霧大夫曰自五氣初運二靈
始分蛇身之帝牛首之君焉足道哉若乃聖皇之
馭國得附枝而居位陋重華之聰明茂放勳之文
思通犀文甲之獻相繼於天府金鸞銀鳥之錫不
絕於史書當此之時子能佩玉而侍乎公子竦然
曰前靡靡之數說皆非鄙性之所娛如今之善誘

請就列於康衢

詔

封長沙王詔五年二月

高帝

故衡山王吳芮與子二人兄子一人從百粵之兵以佐諸侯誅暴秦有大功諸侯立以為王項羽侵奪之地謂之番君番蒲何反其以長沙豫章象郡桂林南海立番君芮為長沙王

復諸侯子等詔五月

諸侯子在關中者復之十二歲其歸者半之民前

或相聚保山澤不書名數今天下定令各歸其縣復故爵田宅吏以文法教訓辨告勿笞辱民以饑餓自賣為人奴婢者皆免為庶人軍吏卒會赦其亡罪而亡爵及不滿大夫者皆賜爵為大夫故大夫以上賜爵各一級其七大夫以上皆令食邑非七大夫以下皆復其身及戶勿事

令善遇高爵詔前

七大夫公乘以上皆高爵也諸侯子及從軍歸者甚多高爵吾數詔吏先與田宅及所當求於吏者

廣府文選 卷之六 二十四
亟與爵或人君上所尊禮久立吏前曾不為決甚
亡謂也異日秦民爵公大夫以上令丞與亢禮今
吾於爵非輕也吏獨安取此且法以有功勞行田
宅今小吏未嘗從軍者多滿而有功者顧不得皆
公立私守尉長吏教訓甚不善其令諸吏善遇高
爵稱吾意且庶問有不如吾詔者以重論之

獻費詔 十一年
二月

欲省賦甚今獻未有程吏或多賦以為獻而諸侯
王尤多民疾之令諸侯王通侯常以十月朝獻及

郡各以口數率人歲六十三錢以給獻

立南粵王詔 五

粵人之俗好相攻擊前時秦徙中縣之民南方三
郡使與百粵雜處會天下誅秦南海尉它居南方
長治之甚有文理中縣人以故不耗減粵人相攻
擊之俗益止俱賴其力今立它為南粵王

置守冢詔 十一

秦皇帝楚隱王魏安釐王齊愍王趙悼襄王皆絕
巨後其與秦始皇帝守冢二十家楚魏齊各十家

趙及魏公子已忌各五家令視其冢復已與他事

三月詔

吾立為天子帝有天下十二年于今矣與天下之
豪士賢大夫共定天下同安輯之其有功者上致
之王次為列侯下為食邑而重臣之親或為列侯
皆令自致吏得賦歛女子公主為列侯食邑者皆
佩之印賜大第室吏二千石徙之長安受小第室
入蜀漢定三秦者皆世世復吾於天下賢士功臣
可謂亡負矣其有不義背天子擅起兵者與天下

共伐誅之布告天下使明知朕意

差次功臣

二年春

呂后

高皇帝匡飭天下諸有功者皆受分地為列侯萬
民大安莫不受休德朕思念至於久遠而功名不
著亡以尊大誼施後世今欲差次列侯功以定朝
位臧于高廟世世勿絕嗣子各襲其功位其與列
侯議定奏之

即位赦天下詔

文帝

制詔丞相太尉御史大夫間者諸呂用事擅權謀

為大逆欲危劉氏宗廟賴將相列侯宗室大臣誅之皆伏其辜朕初即位其赦天下賜民爵一級女子百戶牛酒酺五日

有司請建太子詔正

朕既不德上帝神明未歆饗也天下人民未有慝志今縱不能博求天下賢聖有德之人而嬪天下焉而曰豫建太子是重吾不德也謂天下何其安之

又

楚王季父也春秋高闕天下之義理多矣明於國家之體吳王於朕兄也淮南王弟也皆秉德以陪朕豈為不豫哉諸侯王宗室昆弟有功臣多賢及有德義者若舉有德以陪朕之不能終是社稷之靈天下之福也今不選舉焉而曰必子人其以朕為忘賢有德者而專於子非以憂天下也朕甚不取

開籍田詔正

夫農天下之本也其開籍田朕親率耕以給宗廟

詔議徙民寬地

元年正月

景帝

間者歲比不登民多乏食天絕天年朕甚痛之郡國或硤陜無所農素較畜較謂食養之畜謂或地收放也較古繫字饒廣薦草莽水泉而不得徙其議民欲徙寬大地者聽之

擊七國詔三

年

制詔將軍蓋聞為善者天報以福為非者天報以殃高皇帝親垂功德建立諸侯幽王悼惠王絕無後孝文皇帝哀憐加惠王幽王子遂悼惠王子邛

等令奉其先王宗廟為漢藩國德配天地明並日月而吳王濞背德反議誘受天下亡命罪人亂天下幣稱疾不朝二十餘年有司數請濞罪孝文皇帝寬之欲其改行為善今乃與楚王戊趙王遂膠西王邛濟南王辟光菑川王賢膠東王雄渠約從謀反為逆無道起兵以危宗廟賊殺大臣及漢使者迫劫萬民伐殺無罪燒殘民家掘其丘壟甚暴虐而邛等又重逆無道燒宗廟鹵御物朕甚痛之朕素服避正殿將軍其勸士大夫擊反虜者深入

多殺為功斬首捕虜比三百石以上皆殺無有所置敢有議詔及不如詔者皆要斬

讞獄詔中五年九月

法令度量所以禁暴止邪也獄人之大命死者不可復生吏或不奉法令以貨賂為市朋黨比周以

苛為察以刻為明令亡罪者失職朕甚憐之師古曰職

常也失其常理也有罪者不以罪姦法為暴甚亡謂也諸

獄疑若雖文致於法而於人心不厭者輒讞之

吏車服詔中六年五月

夫吏者民之師也車駕衣服宜稱六百石以上皆

長吏也亡度者或不吏服出入閭里與民無異令

長吏二千石車朱兩轡師古據許慎李登說轡車之蔽也千石至

六百石朱左轡車騎從者不稱其官衣服下吏出

入閭巷亡吏體者二千石上其官屬三輔舉不如

法令者皆上丞相御史請之

訾筭詔五

人不患其不知患其為詐也不患其不勇患其為

暴也不患其不富患其亡馱也其惟廉士寡欲易

足今些筭十以上迺得官

應劭曰古者。吏之貪衣食足知榮辱限些十

筭乃得為吏十筭十萬也

廉士筭不必衆有市籍不得官無些

又不得官朕甚愍之些筭四得官亡令廉士久失

職貪夫長利

修山川祠詔五月

武帝

河海潤千里其令祠官修山川之祠為歲事曲加禮

封丞相弘詔

朕嘉先聖之道開廣門路宣招四方之士盖古者

任賢而序位量能以授官勞大者厥祿厚德盛者

獲爵尊故武功以顯重而文德以行褒其以高城

之平津鄉戶六百五十戶封丞相弘為平津侯

遣謁者巡行天下詔

元狩元年四月

朕聞咎繇對禹曰在知人知人則哲惟帝難之盖

君者心也民猶支體支體傷則心惜怛日者淮南

衡山脩文學流貨賂兩國接壞怵於邪說而造篡

弑此朕之不德詩云憂心慘慘念國之為虐以赦

天下滌除與之更始朕嘉孝弟力田哀夫老眊孤

寡鰥獨或匱於衣食甚憐憫焉其遣謁者巡行天

下存問致賜曰皇帝使謁者賜縣三老孝者帛人
五匹鄉三老弟者力田帛人三匹年九十以上及
鰥寡孤獨帛人二匹絮三十斤八十以上米人三
石有冤失職使者以聞縣鄉即賜無贅聚

勿收振貸詔

始元二年八月

昭帝

往年災害多今年蠶麥傷所振貸種食勿收責毋
令民出今年田租

賜遺韓福等詔

元鳳元年三月

朕閱勞以官職之事其務脩孝弟以教鄉里行道

舍傳舍縣次具酒肉食從者及馬長吏以時存問
常以歲八月賜羊一頭酒二斗不幸死者賜複衾

一祠以中牢

一云常以正月賜羊酒
有不幸者賜衣被一襲

嘉霍光詔

三年三月

宣帝

大司馬大將軍博陸侯宿衛孝武皇帝三十餘年
輔孝昭皇帝十有餘年遭大難躬秉義率三公諸
侯九卿定萬世策以安宗廟天下蒸庶咸以康寧
功德茂盛朕甚嘉之復其後世疇其爵邑世世毋
有所與功如蕭相國

罷車騎等屯兵詔

迺著九月壬申地震朕甚懼焉有能箴朕過失及賢良方正極諫之士以匡朕之不逮毋諱有司朕既不德不能附遠是以邊境屯戍未息今復飭兵重屯久勞百姓非所以綏天下也其罷車騎將軍右將軍屯兵

又詔池籩未御幸者假與貧民郡國宮館勿復修治流民還歸者假公田貸種食且勿筭事

赦為霍氏所誣誤者詔九月

迺者東織室令史張赦使魏郡豪李竟報冠陽侯

雲謀為大逆謀一作欲朕以大將軍故抑而不揚冀其

自新今大司馬博陸侯禹與母宣成侯夫人顯及

從昆弟冠陽侯雲樂平侯山諸姊妹壻度遼將軍

范明友長信少府鄧廣漢中郎將任勝騎都尉趙

平長安男子馮啟等謀為大逆顯前又使女侍醫

淳于衍進藥殺共哀后謀毒太子欲危宗廟逆亂

不道欲誣誤百姓賴宗廟神靈先發得咸伏其辜

朕甚悼之諸為霍氏所誣誤事在丙申前未發竟

在吏者皆赦除之男子張章先發竟以語期門董
忠忠告左曹楊惲惲告侍中金安上惲召見對狀
後章上書以聞侍中史高與金安上建發其事言
無入霍氏禁闈卒不得遂其謀皆讎其功封章為
博成侯忠高昌侯惲通侯安上都成侯高樂陵侯

察吏詔五月

獄者萬民之命所以禁暴止邪養育群生也能使
生者不怨死者不恨則可謂文吏矣今則不然用
法或持巧心析律貳端深淺不平增辭飾非以成

其罪奏不如實上亦無繇知此朕之不明吏之不
稱四方黎民將何仰哉二千石各察官屬勿用此
人吏務平法或擅興繇役飾厨傳稱過使客越職
踰法以取名譽譬猶踐薄冰以待白日豈不殆哉
今天下頗被疾疫之災朕甚愍之其令郡國被災
甚者毋出今年租賦

改元神爵詔

朕承宗廟戰戰栗栗惟萬事統未燭厥理迺元
康四年嘉穀玄稷降于郡國神爵仍集金芝九莖

產于函德殿銅池中九瓊獻奇獸南郡獲白虎威鳳為寶朕之不明震于珍物飭躬齋精祈為百姓東濟大河天氣清靜神魚舞河幸萬歲宮神爵翔集朕之不德懼不能任其以五年為神爵元年賜天下勤事吏爵二級民一級女子百戶牛酒鰥寡孤獨高年帛所振貸物勿收行所過毋出田租

單于稱臣詔

三年三月

往者匈奴數為邊寇百姓被其害朕承至尊未能綏安匈奴虛問權渠單于請求和親病死右賢王

屠耆堂代立骨肉大臣立虛問權渠單于子為呼韓邪單于擊殺屠耆堂諸王並自立分為五單于更相攻擊死者以萬數畜產大耗什八九人民饑饉相燔燒以求食內大乖亂單于闕氏子孫昆弟及呼遼累單于名王右伊秩訾且渠當戶以下將眾五萬餘眾來降歸義單于稱臣使弟奉琮朝賀正月北邊晏然靡有兵革之事朕飭躬齋戒郊上帝祠后土神光並見或興于谷燭煌齋宮十有餘刻甘露降神爵集已詔有司告祠上帝宗廟三月

辛丑鸞鳳又集長樂宮東闕中樹上飛下止地文
 章五色留十餘刻吏民並觀朕之不德懼不能任
 婁蒙嘉瑞獲茲祉福書不云乎雖休勿休祇事不
 怠公卿大夫其勗焉減天下口錢赦殊死以下賜
 民爵一級女子百戶牛酒大酺五日加賜鰥寡孤
 獨高年帛

罷角抵宮館等詔

四年四月

元帝

朕之不逮序位不明衆僚久應未得其人元元失
 望上感皇天陰陽為變咎流萬民朕甚懼之迺者

關東連遭災害饑寒疾疫天不終命詩不云乎凡
 民有喪匍匐救之其令太官毋日殺所具各減半
 乘輿秣馬無乏正事而已罷角抵上林宮館希御
 幸者齊三服宮北假官田鹽鐵官常平倉博士弟
 子毋置負以廣學者賜宗室子有屬籍者馬一匹
 至三駟三老孝者帛人五匹弟者力田三匹鰥寡
 孤獨二匹吏民五十戶牛酒

赦天下詔

永光元年三月

五帝三王任賢使能以登至平而今不治者豈斯

民異哉咎在朕之不明亡以知賢也是故壬人在位而吉士擁蔽重以周秦之弊民漸薄俗去禮義觸刑法豈不哀哉繇此觀之元元何辜其赦天下令厲精自新各務農畝無田者皆假之貸種食如貧民賜吏六百石以上爵五大夫勤事吏二級民一級女子百戶牛酒鰥寡孤獨高年帛

詔舉可充博士者

陽朔二年九月

古之立太學將以傳先王之業流化於天下也儒林之官四海淵源宜皆明於古今温故知新通達

國體故謂之博士否則學者無述焉為天下所輕非所以尊道德也工欲善其事必先利其器丞相御史其與中二千石二千石雜舉可充博士位者使卓然可觀

禁車服奢僭詔

四年六月

聖王明禮制以序尊卑異車服以彰有德雖有財而無其尊不得踰制故民興行上義而下利方今世俗奢僭罔極靡有厭足公卿列侯親屬近臣四方所則未聞脩身遵禮同心憂國者也或迺奢侈

逸豫務廣第宅治園池多奴婢被服綺縠設鐘鼓
備女樂車服嫁娶葬埋過制吏民慕效寔以成俗
而欲望百姓儉節家給人足者豈不難哉詩不云
乎赫赫師尹民具爾瞻其申敕有司以漸禁之青
綠民所常服且勿止列侯近臣各自省改司隸校
尉察不變者

罷樂府詔

哀帝

惟去俗奢泰文巧而鄭衛之聲與夫奢泰則下不
孫而國貧文巧則趨末背本者衆鄭衛之聲興則

淫辟之化流而欲黎庶敦朴家給猶濁其源而求
清流豈不難哉孔子不云乎放鄭聲鄭聲淫其罷
樂府官郊祭樂及古兵法武樂在經非鄭衛之樂

者條奏別屬他官

一云鄭聲淫而凱樂
聖主所放其罷樂

詔寬六百石以下吏罪

六月

光武

吏不滿六百石下至墨綬長相有罪先請男子八
十以上十歲以下及婦人從坐者自非不道詔所
名捕皆不得繫當驗問者即就驗女徒雇山婦家

詔二千石撫循百姓

六年正月

往歲水旱蝗虫為灾穀價騰躍人用困乏朕惟百姓無以自贍惻然愍之其命郡國有穀者給粟高年鰥寡孤獨及篤癯無家屬貧不能自存者如律二千石勉加循撫無令失職

地震詔二十二年九月

日者地震南陽尤甚夫地者任物至重靜而不動者也而今震裂咎在君上鬼神不順無德灾殃將及吏人朕甚懼焉其令南陽勿輸今年田租芻橐遣謁者案行其死罪繫囚在戍辰以前減死罪一

等徒皆弛解鉗衣絲絮賜郡中居人壓死者棺錢人三千其口賦逋稅而廬宅尤破壞者勿收責吏人死亡或在壞垣毀屋之下而冢羸弱不能收拾者其以見錢穀取傭為尋求之

報減宮詔二十七年

黃石公記曰柔能制剛弱能制彊柔者德也剛者賊也弱者仁之助也彊者怨之歸也故曰有德之君以所樂樂人無德之君以所樂樂身樂人者其樂長樂身者不久而亡舍近謀遠者勞而無功舍

遠謀近者逸而有終逸政多忠臣勞政多亂人故
曰務廣地者荒務廣德者彊有其有者安貪人有
者殘殘滅之政雖成必敗今國無善政災變不息
百姓驚惶人不自保而復欲遠事邊外乎孔子曰
吾恐季孫之憂不在顓臾且北狄尚彊而屯田警
備傳聞之事恒多失實誠能舉天下之半以滅大
寇豈非至願苟非其時不如息人

班彪上報北匈奴詔草

建武二十八年此雖未及上而傳云帝悉

納從之又云三十一年北匈奴復遣使乃璽書報答則彪所擬詔必已用

之矣今附見

單于不忘漢恩追念先祖舊約欲修和親以輔身
安國計議甚高為單于嘉之往者匈奴數有乖亂
呼韓郅支自相讎隙並蒙孝宣皇帝垂恩救護故
各遣侍子稱藩保塞其後郅支忿戾自絕皇澤而
呼韓附親忠孝彌著及漢滅郅支韓保國傳嗣子
孫相繼今南單于叩閭向南欵塞歸命自以呼韓
嫡長次第當立而侵奪失職猜疑相背數請兵將
歸掃北庭策謀紛紜無所不至惟念斯言不可獨

唐曆文選
言者之六
聽又以北單于此年貢獻欲修和親故拒而未許
將以成單于忠孝之義漢秉威信總率萬國日月
所照皆為臣妾殊俗百蠻義無親疎服順者褒賞
畔逆者誅罰善惡之效呼韓郅支是也今單于欲
修和親欵誠已達何嫌而欲率西域諸國俱來獻
見西域國屬匈奴與屬漢何異單于數連兵亂國
內虛耗貢物裁以通禮何必獻馬裘今齋雜繒五
百匹弓韃鞞丸一矢四發遣遺單于單于前言先
帝時所賜呼韓邪竿瑟空侯皆敗願復裁賜念單

于國尚未安方厲武節以戰攻為務竿瑟之用不
如良弓利劍故未以齋朕不愛小物於單于便宜
所欲遣驛以聞

即位赦天下

中元二年四月

明帝

予末小子奉承聖業夙夜震畏不敢荒寧先帝受
命中興德侔帝王協和萬邦假於上下懷柔百神
惠於鰥寡朕承大運繼體守文不知稼穡之艱難
懼有廢失聖恩遺戒顧重天下以元元為首公卿
百僚將何以輔朕不逮其賜天下男子爵人二級

三老孝悌力田人三級爵過公乘得移與子若同
產同產子及流人無名數欲自占者人一級鰥寡
孤獨篤癯粟人十斛其施刑及郡國徒在中元元
年四月己卯赦前所犯而後捕繫者悉免其刑又
邊人遭亂為內郡人妻在己卯赦前一切遣還恣
其所樂中二千石下至黃綬貶秩贖論者悉皆復
秩還贖方今上無天子下無方伯若涉淵水而無
舟楫夫萬乘至重而壯者慮經實賴有德左右小
子高密侯禹先功之首東平王蒼寬博有謀竝可

以受六尺之託臨大節而不撓其以禹為太傅蒼
為驃騎將軍太尉熹告謚南郊司徒訢奉安梓宮
司空魴將校復土其封熹為節鄉侯訢為安鄉侯
魴為楊邑侯

東平王蒼辭歸國賜手詔

八月見本傳

章帝

骨肉天性誠不以遠近為親踈然數見顏色情重
昔時念王久勞思得還休欲署大鴻臚奏不忍下
筆顧授小黃門中心戀戀惻然不能言

詔用安靜之吏

正月

方春生養萬物孳甲宜助萌陽以育時物其令有
司罪非殊死且勿案驗及吏人條書相告不得聽
受奠以息事寧人敬奉天氣立秋如故夫俗吏矯
飾外貌似是而非揆之人事則悅耳論之陰陽則
傷化朕甚厭之甚苦之安靜之吏悃悞無華日計
不足月計有餘如襄陽令劉方吏人同聲謂之不
煩雖未有它異斯亦殆近之矣間勅二千石各尚
寬明而今富姦行賂於下貪吏枉法於上使有罪
不論而無過被刑甚大逆也夫以苛為察以刻為

明以輕為德以重為威四者或興則下有怨心吾
詔書數下冠蓋接道而免不加理人或失職其咎
安在勉思舊令稱朕意焉

興禮樂詔

見曹褒傳

河圖稱赤九會昌十世以光十一以興尚書璇璣
鈴曰述堯理世平制禮樂放唐之文予末小子託
于數終曷以續興崇弘祖宗仁濟元元帝命驗曰
順堯考德題期立象且三五步驟優劣殊軌况子
頑陋無以克堪雖欲從之末由也已每見圖書中

心慙焉

禱雨詔甲申

春秋書無麥苗重之也去秋雨澤不適今時復旱如憊如焚凶年無時而為備未至朕之不德上累三光震慄切切痛心疾首前代聖君博思咨諏雖降災咎輒有開置反風之應今予小子徒慘慘而已其令二千石理冤獄錄輕繫禱五嶽四瀆及名山能興雲致雨者冀蒙不崇朝而雨天下之報務加肅敬焉

下丞相亮出師詔

後主

朕聞天地之道福仁而禍淫善積者昌惡積者喪古今常数也是以湯武脩德而王桀紂極暴而亡曩者漢祚中微網漏凶慝董卓造難震蕩京畿曹操階禍竊執天衡殘剝海內懷無君之心子丕孤豎敢尋亂階盜據神器更姓改物世濟其凶當此之時皇極幽昧天下無主則我帝命隕越于下昭烈皇帝體明叡之德光演文武應乾坤之運出自平難經營四方人鬼同謀百姓與能兆民欣戴奉

順符讖建位易號丕承天序補弊興衰存復祖業
膺誕皇綱不墜于地萬國未靜早世遐殂朕以幼
冲繼統鴻基未習保傳之訓而嬰祖宗之重六合
壅否社稷不建求惟所以念在匡救光載前緒未
有攸濟朕甚懼焉是以夙興夜寐不敢自逸每崇
菲薄以益國用勸分務穡以阜民財授方任能以
參其聽斷私降意以養將士欲奮劔長驅指討凶
逆朱旗未舉而不復隕喪斯所謂不然我薪而自
然也殘類餘醜又支天禍恣睢河洛阻兵未弭諸

葛丞相弘毅忠壯忘身憂國先帝託以天下以勗
朕躬今授之以旄鉞之重付之以專命之權統領
步騎二十萬衆董督元戎龔行天伐除患寧亂克
復舊都在此行也昔項籍惣一彊衆跨州兼土所
務者大然卒敗垓下歿于東城宗族如赫為笑千
載皆以不義凌上虐下故也今賊效尤天人所怨
奉時宜速庶馮炎精祖宗威靈相助之福所向必
克吳王孫權同恤災患潛軍合謀掩角其後涼州
諸國王各遣月支康居胡侯支富康植等二十萬

餘人詣受節度大軍北出便欲率將兵馬奮戈先
驅天命既集人事又至師貞勢并必無敵矣夫王
者之兵有征無戰尊而且義莫敢抗也故鳴條之
役軍不血刃牧野之師商棄邪從正簞食壺漿以
迎王師者國有常典封寵大小各有品限及魏之
宗族支葉中外有能規利害審順逆之數來諸降
者皆原除之昔輔果絕親于智氏而蒙全宗之福
微子去啟項伯歸漢皆受茅土之慶此前世之明
驗也若其迷沉不反將助亂人不式王命戮及妻

孥罔有攸赦廣宣恩威貸其元師弔其殘民他如
詔書律令丞相其露布天下使稱朕意焉

封孔羨詔

魏文帝

詔曰昔仲尼資大聖之才懷帝王之器當衰周之
末無受命之運在魯衛之朝教化乎洙泗之上悽
悽焉遑遑焉欲屈已以存道貶身以救世于時王
公終莫能用之乃退考五代之禮脩素王之事因
魯史而制春秋就大師而正雅頌俾千載之後莫
不宗其文以述作仰其聖以成謀咨可謂命世之

唐書文選 卷之六
大聖億載之師表者也遭天下大亂百祀墮壞舊
居之廟毀而不修褒成之後絕而莫繼闕里不聞
講頌之聲四時不覩蒸嘗之位斯豈所謂崇禮報
功盛德百世必祀者哉其以議卽孔羨為宗聖侯
邑百戶奉孔子祀令魯郡修起舊廟置百戶吏卒
以守衛之又於其外廣為室屋以居學者

答東阿王詔

文帝

蓋教化所由來有隆弊非皆善始而惡終也事使
之然故夫忠厚仁及草木則行葦之詩作恩澤衰

薄不親九族則角弓之章刺令諸國兄弟情禮簡
怠妃妾之家膏沐疏畧朕縱不能敦而睦之王援
古喻義備悉矣何言精神不足以感通哉夫明貴
賤明親親禮賢良順少長國之綱紀本無禁固諸
國通問之詔也矯枉過正下吏懼譴以至于此耳
已勅有司如王所訴

繼統詔

明帝

詔曰禮皇后無嗣擇建支子以繼太宗則當纂正
統而奉公義何得復顧私親哉漢宣繼昭帝後加

悼考以皇號象帝以外藩援立而董宏等稱引亡
秦或誤時朝既尊恭皇立廟京都又寵藩妾使比
長信叙昭穆於前殿並四位於東宮僭差無度人
神弗祐而非罪師丹忠正之諫用致丁傅焚如之
禍自是之後相踵行之昔魯文逆祀罪由夏父宋
國非度譏在華元其令公卿有司深以前世行事
為戒後嗣萬一有由諸侯入奉大統則當明為人
後之義敢為佞邪導諛時君妄建非正之號以干
正統謂考為皇誦妣為后則股肱大臣誅之無赦
其書之金策藏之宗廟著于令典

因革詔

明 帝

詔曰滄直言引亮正想群賢達吾此懷矣予違汝
弼堯舜之相君臣也吾雖虛闇庶不距逆耳之談
稷契之任君居之矣望共勗之

即位詔

元 帝

詔曰昔我高祖宣皇帝誕應期運廓開王基景文
皇帝奕世重光緝熙諸夏爰暨世祖應天順時受
茲明命功格天地仁濟宇宙昊天不融降此鞠凶

懷帝短世越去王都天禍荐臻大行皇帝崩殂社稷無奉肆群后三司六事之人疇咨庶政至于華戎致輯大命于朕躬予一人畏天之威用莫敢違遂登壇南嶽受終文祖赫柴頒瑞告類上帝曰朕寡德纘我洪緒若涉大川罔知攸濟惟爾股肱賢才之佐文武熊羆之臣用能弼寧晉室輔予一人俾與萬國共同休慶於是大赦改元

戴逵龔玄之詔

孝武帝

夫哲王御世必搜揚幽隱故空谷流縶維之詠丘

園旅束帛之觀譙國戴逵武陵龔玄之並高尚其操依仁游藝潔已貞鮮學弘儒業朕虛懷久矣二三君子豈其戢賢於懷抱哉思挹雅言戲誠諷議可並以為散騎常侍領國子博士指下所在備禮發遣不得循常以稽側席之望

救弊詔

元帝

詔曰天下大弊加以災荒百姓困窮國用並匱吳郡饑人死者百數天生蒸黎而樹之以君選建明哲以左右之當深思以救其弊昔吳起為楚悼王

明法審令捐不急之官除廢公族踈遠以附益將士而國富兵強况今日之弊百姓凋困邪且當去非急之務非軍事所須者皆省之

卹琅琊詔

元帝

詔曰先公武王先考恭王臨君琅琊四十餘年惠澤加於百姓遺愛結於人情朕應天符創基江表兆庶宅心繼負漿水琅琊國人在此者近有千戶今立為懷德縣統丹陽郡昔漢高祖以沛為湯沐邑光武亦復南頓優復之利一依漢氏故事

置諫鼓謗木詔

元帝

王室多故姦凶肆暴皇綱弛墜顛覆大猷朕以不德統承洪緒夙夜憂危思改其弊二千石令長當祇奉舊正身明法抑齊豪強存恤孤獨隱實戶口勸課農桑州牧刺史當互相檢察不得顧私虧公長吏有志在奉公而不見進用者有貪恠穢濁而以財勢自安者若有不舉當受故縱弊善之罪有而不知當受闇塞之責各明慎奉行

錄吳將士名賢之後詔

明帝

詔曰昔周武克啟封比干之墓漢高過趙錄樂毅
之後追顯既往以勸將來也吳時將相名賢之胄
有能纂脩家訓又忠孝仁義靜已守真不聞于時
者州郡中正亟以名聞勿有所遺

修五嶽祠詔

晉武帝

昔聖帝明王脩五嶽四瀆名山川澤各有定制所
以報陰陽之功故也然以道蒞天下者其鬼不神
其神不傷人故視史薦而無媿辭是以其人敬慎
幽冥而淫祀不作末世信道不篤僭禮瀆神縱欲

祈請曾不敬而遠之徒偷以求幸祆妄相煽舍正
為邪故魏朝疾之其按舊禮具為之制使功著於
人者必有其報而祆淫之鬼不亂其間

晉元熙二年禪位詔

夫天造草昧樹之司牧所以陶鈞三極統天施化
故大道之行選賢與能隆替無常期禪代非一族
貫之百王由來尚矣晉道陵遲仍世多故爰暨元
興禍難既積至三光賀位冠履易所安皇播越宗
祀墮泯則我宣元之祚永墜于地顧瞻區域翦焉

已傾相國宋王天縱聖德靈武秀世一匡顛運再造區夏固以興滅繼絕舟航淪溺矣若夫仰在璿璣旁穆七政薄伐不庭開復疆宇遂乃三俘偽主開滌五都雕顏奔服之鄉龍荒朔漠之長莫不迴首朝陽沐浴玄澤故四靈効瑞川岳啟圖嘉祥雜選休應炳著立象表革命之期華裔注樂推之願代德之符著乎幽顯瞻烏爰止允集明哲夫豈延康有婦咸熙告謝而已哉昔火德既微魏祖底績黃運不競三后肆勤故天之曆數寔有攸在朕雖

庸闇昧於大道永鑒廢興為日已久念四代之高義稽天人之至望予其遜位別宮歸禪于宋一依唐虞漢魏故事

宋大明元年十月詔

孝武帝

旒纒之道有孚於結繩日昊之勤已切於姬后况世弊教淺歲月澆季朕雖勩力寓內未明求衣而識狹前王務廣昔代永言菲德其愧良深朝咨野怨自達者寡惠民利公所昧寔衆自今百辟庶尹下民賤隸有懷誠抱志擁鬱衡問失理負謗未聞

朝聽者皆聽躬自申奏小大以聞朕因聽政之日親對覽焉


宋大明七年二月詔

孝武帝

朕受天慶命十一年於茲矣憑七廟之靈獲上帝之力禮橫四海威震八荒方巡三湘而奠衡嶽次九河而檢云岱今恢覽功成省風畿表觀民六合蒐校長州騰沙飛礫平嶽盪海鼓音合序鏡歌協節獻鬯如禮饘馱傾郊敬舉王公之觴廣納士民之壽八風循通卿雲業聚晝天罄瑞率宇竭歡思

散太極之泉以福無方之外可大赦天下行幸所無出今歲租布其逋租餘債勿復收賜民爵一級女子百戶牛酒刺守邑宰及民夫從蒐者竝加洽賚

廣廣文選
卷之六



廣廣文選卷之六

--	--	--	--	--	--	--	--	--	--

